

- प्रधानमंत्री नरेन्द्र मोदी कह्यो-वां री सरकार रा कल्याणकारी कामां ऊं 25 करोड़ लोग गरीबी ऊं ऊंचा उट्या।
- मुख्यमंत्री भजनलाल शर्मा सरपंचां ऊं गांवां रा विकास मांय पूरा मन ऊं मदद करण री अपील कीनी।
- प्रदेश मांय एग्रीस्टैक योजना रा तैत किसान रजिस्ट्री परियोजना काल सुरू व्हेला-31 मार्च ताई ग्राम पंचायतां माथे लगाया जावण वाळा शिविरां मांय किसानां री आईडी बणायी जावेला।
- प्रदेश मांय देवनारायण जयंती रे मौके न्यारा-न्यारा कार्यक्रम राखी ज्या।

000

प्रधानमंत्री नरेन्द्र मोदी कह्यो है के वां रा राज मांय गरीब लोगों रा भला सारू केई जतन करी ज्या है, ज्यां रे कारण 25 करोड़ लोग गरीबी ऊं ऊंचा उट्या है। वे कह्यो के ओ सरकार री प्रतिबद्धता, समर्पण अर करड़ी मेहनत रे कारण ही व्हे सक्यो है। प्रधानमंत्री आज लोकसभा मांय, संसद रा दोन्यूसदनां री भेळी मीटिंग मांय राष्ट्रपति रा अभिभाषण रा धन्यवाद प्रस्ताव माथे चर्चा रो जवाब दे रह्या हा। राष्ट्रपति रा अभिभाषण री सराहवणा करता थकां प्रधानमंत्री कह्यो के ओ प्रेरणा देवण वाळो है जिण ऊं सरकार री विकसित भारत बणावण री कोशिशां ने और ताकत मिली है। सरकार री कोशिशां रो जिक करता थकां प्रधानमंत्री कह्यो के केन्द्र सरकार जनता री समस्यावां दूर कर र वां ने आराम देवण रो काम कर रही है।

000

केंद्रीय कृषि मंत्री शिवराज सिंह चौहान भ्रष्टाचार रे खिलाफ करड़ी कार्रवाई रो भरोसो दिराता थकां कह्यो है के सरकार गड़बड़ियां बर्दाश्त नी करेला। वे आज लोकसभा मांय प्रश्नकाल रे दौरान राष्ट्रवादी कांग्रेस पार्टी री नेता सुप्रिया सुले कानी ऊं महाराष्ट्र रा कृषि विभाग मांय 5 हजार करोड़ रुपया रा भ्रष्टाचार रा आरोप रा जवाब मांय आ बात कही। कृषि मंत्री कह्यो के ई बारा मांय वां ने फिल्हाल जाणकारी नी है, पण इण री जांच कर र गड़बड़ियां मिलण री सूरत मांय दोषियां रे खिलाफ करड़ी कार्रवाई करी जावेला।

000

मुख्यमंत्री भजनलाल शर्मा कह्यो है के सरपंच गांवां रा विकास री रीढ़ व्हे है। वे आज जयपुर मांय सरपंच संघ राजस्थान कानी ऊं राखी ज्या कार्यक्रम मांय बोल रह्या हा। मुख्यमंत्री सरपंचां ऊं विकास सारू सक्रियता ऊं काम करण बाबत कह्यो। वे कह्यो के विकास रा कामां रो दायित्व सरपंचां माथे है अर वां कने विकास करण सारू पूरा हक ई है। श्री शर्मा सरपंचां ऊं काल ऊं सुरू व्हे रह्या किसानां री आई.डी. बणावण रा काम मांय मदद करण री अपील कीनी।

कार्यक्रम मांय पंचायतीराज मंत्री मदन दिलावर सरपंचां ऊं केंद्र अर राज्य सरकार री योजनावां री जाणकारी अर फायदो जनता ताई पूगावण मांय मदद करण सारू कह्यो।

000

प्रदेश मांय एग्रीस्टैक योजना रा तैत काल किसान रजिस्ट्री परियोजना सुरू करी जावेला। ई रा तैत राज्य रा सगळा जिलां मांय शिविर लगा र किसानां री फार्मर रजिस्ट्री आई.डी. बणावण मांय मदद करी जावेला। अभियान रा तैत 31 मार्च ताई ग्राम पंचायत लेवल माथे शिविर लगाया जावेला।

.....
आं शिविरां मांय किसान आईडी बणावण सागे प्रधानमंत्री सूर्य घर योजना, मुख्यमंत्री आरोग्य आयुष्मान योजना, किसान क्रेडिट कार्ड मंगला पशु बीमा योजना, पशु टीकाकरण अर ईलाज समेत पशु पालन विभाग अर दूजा महकमां री न्यारी-न्यारी योजनावां रो फायदो ई दियो जावेला।

000

केंद्र सरकार री ओर ऊं जलग्रहण विकास सारु प्रधानमंत्री कृषि सिंचाई योजना 2.0 रा तैत वाटरशेड यात्रा रो राज्य स्तर रो कार्यक्रम काल सुरु व्हे रह्यो है। वाटरशेड यात्रा बारां ज़िला री किशनगंज ग्राम पंचायत ऊं सुरु व्हेला। पंचायती राज मंत्री मदन दिलावर रो इण री सुरुआत करण रो कार्यक्रम है। ई मौके जिला स्तर रो श्रमदान, पौधा रोपण, कलश यात्रा अर पाणी बचावण री शपथ लेवण रा कार्यक्रम राख्या जावेला। जलग्रहण यात्रा रो मकसद जलग्रहण ऊं जुड़्या कामां री जाणकारी जनता ने देवण अर इण रा फायदा रा बारा मांय जाग जगावणो है। आ यात्रा दो रथां रे मार्फत राज्य री 214 ग्राम पंचायतां ऊं व्हेती निकळेला।

000

शिक्षा मंत्री मदन दिलावर कह्यो है के प्रधानमंत्री नरेंद्र मोदी देश ने खुद रे पाण ऊबो करण सारु विद्यार्थियां अर नौजवानां री कौशल शिक्षा माथे जोर दीनो है। वे कह्यो के इण ने ध्यान राखता थकां राज्य सरकार स्कूलां मांय व्यावसायिक अर कौशल शिक्षा माथे खास ध्यान दे रही है। श्री दिलावर राजस्थान स्कूल शिक्षा परिषद कानी ऊं आज जयपुर मांय राख्यी ज्या राज्य स्तर रा स्किल एग्जिबिशन कम कंपीटिशन कार्यक्रम मांय बोल रह्या हा। श्री दिलावर कह्यो के प्रदेश री 4 हजार 155 सरकारी सीनियर सैकण्ड्री स्कूलां मांय व्यावसायिक शिक्षा दी जा रही है। वे कह्यो के सरकार व्यावसायिक शिक्षा रा 75 हजार ऊं बत्ता विद्यार्थियां ने घर सारु कौशल विकास सामग्री मुहैया करायी है।

000

प्रदेश मांय आज भगवान देवनारायण जयंती सिरधाभाव सागे मणायी ज्यी। भीलवाड़ा जिला रा सवाई भोज मंदिर अर भगवान देवनारायण री जन्मस्थली मालासेरी मांय खास पूजा-अर्चना रा कार्यक्रम राख्यी ज्या। उपमुख्यमंत्री दिया कुमारी अर गृह राज्य मंत्री जवाहर सिंह बेढम ई सवाईभोज मंदिर मांय राख्यी ज्या कार्यक्रम मांय शिरकत कीनी। ई मौके उप मुख्यमंत्री प्रेमसागर तळाव ने और चोखो बणावण अर बालिका आवासीय स्कूल खोलण रो ऐलाण कीनो। ई मौके सवाईभोज मंदिर परिसर मांय खूनदान शिविर ई लगायी ज्यो। सवाईमाधोपुर जिला रा चौथ का बरवाड़ा अर घाटा नैनवाड़ी रा देवनारायण मन्दिरां मांय ई खास भोग, पूजा, अर्चना, महाप्रसादी अर प्रतिभा सम्मान समारोह सरीखा कार्यक्रम राख्यी ज्या। और ब्यौरो म्हारा खबरनवीस ऊं—

ई मौके पाली मांय खास गेलां ऊं व्हेती थकी शोभायात्रा निकाळी ज्यी। भरतपुर जिला रा बयाना मांय ई शोभायात्रा निकाळी ज्यी, जिण रो फूलां री बरसात कर र स्वागत करी ज्यो। ई सागे ई जिला री न्यारी-न्यारी तहसीलां मांय धार्मिक कार्यक्रम राख्यी ज्या।

000

आज विश्व कैंसर दिवस है। कैंसर रा बारा मांय जाग जगावण अर इण री रोकथाम, पिछाण अर ईलाज ने बधावो देवण सारु हर साल 4 फरवरी ने ओ दिन मनायो जावे है। विश्व कैंसर दिवस रो ई साल रो मुद्दो है — **यूनाइटेड बाय यूनिक्**। नई दिल्ली मांय एम्स रा ऑन्कोलॉजी विभाग रा प्रोफेसर डॉ. एम. डी. रे आकाशवाणी समाचार सागे बातचीत मांय कह्यो के कैंसर ला-ईलाज बीमारी नी है। राज्य मांय ई ई मौके भांत-भांत रा कार्यक्रम राख्यी ज्या। पाली मांय महिलावां नुक्कड़ नाटक रे जरिए कैंसर रा बारा मांय जाग जगायी। राजकीय बांगड़ अस्पताल रा डॉक्टर के.सी. सैनी बतायो के कैंसर ऊं बचाव सारु तंबाकू काम नी लेवणो चाहिजे अर नशो नी करणो चाहिजे।

श्रीगंगानगर मांय जागरुकता कार्यशाला व्ही। ई दौरान विद्यार्थी कलात्मक पोस्टर बणा र कैंसर ऊं बचाव रो संदेश दीनो।

000